

Vun driweriver

erscheint auf www.lenauheim.de

monatliche
Erscheinung

September 2020

von Helen Alba

„Es Wackrichgin“ noh em „Rausch“

E Rausch, ja des kann meherlei bedeite. Mer kann im Rausch sin, wann mer zuvill Raki, Wein oder anre Alkohol getrunk hat – do muss mer sei Rausch halt ausschlofe. Doch owachtgin, derbei nit sichtlich zu gin. Dann heert mer so oft vum Rauschgift. Des kann mer schnuppre, schlicke oder sich in die Odre impfe. Un so e Rausch is gefährlich. Im Moment vergesst mer wahrscheinlich sei Sorche, Kummer un die Welt um sich her. Doch um vun so eem Rausch wechzukumme, do brauch mer Hilf, muss e Entziehungskur mache – ich tät saan: Finger weg vun so was.

Mer kann a im Arweitsrausch sin un sich so ninsteigre, dass mer nimi koche, wäsche, ruhe tut un nor vorwärtskumme will. Doch ach so was kann zu keem gute End fiehre, weil de Mensch brauch ausser Arweit ach Entspannung, Schlof un Esse. Im Rausch kann mer a sin, wann mer stundelang vor dem Computer sitze un in der ganzi Welt rumflangiere tut. Derbei verderbt mer sich die Aue.

Doch ich will jo vun dem Rausch schreiwe, de wu mer han kann, wann mer nit vun der Flimmerkischt wechkommt. Un neierdings, seider der Korona-Virus die ganzi Welt verunsichert, hucke mer vor der Flimmerkischt un schau uns die Aue aus, horche uns die Ohre teerisch un hoffe, dass gscheidere Leit wie mir so schnell wie meeglich e Auswech finne were.

Doch papperlapapp hin, Talkerei her – die sin im Rausch, mir sin im Rausch un es bleibt nix anres iwrich, wie druf zu warte, wie so e „Rausch“ ausgehn tut! Ich hoff nor, es werd for alli e baldiches un glickliches „Wackrichgin“! (ha)

De erschte Fernseher im Dorf

Un wieder denk ich zuruck an selli Johre, wie de erschte Fernseher ins Dorf (Bogarosch) kumm is. Er hat bei unsre Nochbre in der vorderschti Stub gstann un villi Gasseleit sin zu de Strickers owets Fernseh schau gang. Ich kann nimi genau saan, welles Jahr dass mer selmols gschrieb han. Doch es war Summer un die Fussballe-Weltmeischterschaft is iwertraa gin. Natierlich schwarz-weiss. Mir han in dere Stub gsitzt, mer kann schun bal saan ufenaner – die Stub war jedenfalls gstuppte voll, iwerhauptscht wann die Deitsche gspillt han. Domols war de Uwe Seeler als Held im Geropps. Jeder hat was zum Beisse oder Knawwre mitgebrung: Summeräppl, gebrodni Kerbsekheere.... Uwe Seeler is jetz 84 Jahr alt. Er hat drei Techter un siewe Enkleskinner.